


明朝典彙



				漢書門類
九	二	〇	〇	
一	〇	四	五	
六	四	三	四	
冊	架	函	號	類

內閣文庫			
九	二	〇	〇
一	〇	四	五
六	四	三	四
冊	架	函	號
漢	書	門	類

內閣文庫	
番號	漢 9205
冊數	64 (33)
函號	294 39

世三



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



國朝典彙卷七十九

都察院右僉都御史臣徐學聚 編輯

吏部 四十五

存太僕寺 死馬寺

淺草文庫

洪武三十年置山西北平陝西遼東行太僕寺凡邊衛營
堡府州縣軍民壯騎撫馬印烙課較孳牧以時督察之

凡馬種牡十二牝十八馬金地畝十七椿朋十三凡馬
瘠耗罰俸罰馬降級出革懲董之藩臬不得預馬事考
馬官苑馬寺亦如之

永樂四年二月左右軍都督府官早於奉天門欽奉 聖

旨如今陝西等都司開設行太僕寺恁都府行文去說
與都司衛所知道這箇衙門職專提調馬匹比較孳生
但有作弊虧欠馬匹許令本寺舉問品職雖小所掌事
重如同御史出巡按治該管指揮千百戶衛所鎮撫首
領官吏務要將所養一應馬騾盡數開報聽從點視提
督敢有非理抗拒許令本寺官開奏拿問

九月設陝西甘肅二苑馬寺掌馬牧之事而聽於兵部凡
馬種上苑萬匹中苑七千下苑四千不及則銀市而茶
易焉凡牧地曰草場曰荒地曰熟地嚴禁令而封表之
凡牧人曰恩軍曰隊軍曰改編之軍曰克發之軍曰抽

選之軍皆籍而食之凡馬駒二年二科十八年而免定
駒頭駒重駒籍而報之有常期凡虧駒有罰

五年十月增設北京苑馬寺六監二十四苑順義長春咸
和馴良四苑隸清河監水州隆萃大牧遂寧四苑隸金
臺監沂池鹿鳴龍河長興四苑隸涿鹿監遼陽龍山萬
安蕃昌四苑隸盧龍監清流廣蕃龍泉松林四苑隸香
山監河陽崇義興寧永成四苑隸通州監

宣德四年七月兵部尚書張本奏北京操備官軍請置勘
合發北京行太僕寺收掌馬每官馬一匹給勘合一道
填寫齒色年月日轉發五軍各衛并管隊者付領馬之

人執以爲憑遇倒馬等項備由陳告就勘合註寫明白限十日內親送北京行太僕寺比較應償者追視齒色附簿開註勘合與馬如前收領再有事故償給如例如領馬人有故馬與勘合從所管別人收領如此人難欺蔽馬無侵損

七年令法司及陝西布按二司雜犯死罪應克軍者發陝西行太僕寺養馬

正統二年苑馬寺少卿嚴信以官多事少奏准革少卿一寺丞二監副四圍長十三

四年裁革甘肅苑馬寺改牧恩軍於黑水口隸長樂監馬

成化二年奏准馬官三年任內孳生不虧者稱職額外多生者量加旌擢不及額至百匹者降用分管寺丞以所屬課額虧增遞爲黜陟

弘治二年陝西巡撫蕭禎奏革苑馬寺丞一員

十四年兵部議准今後各寺監官員務選才力素優者去待有成效一體不次擢用

十五年南京科道官奏下兵部議准今後行太僕苑馬寺官有缺照在京太僕寺官例推素有才望者簡用待有成績亦照太僕寺官陞擢

十七年都御史楊一清奏行太僕苑馬寺卿員缺乞於附

近年淺素有才望叅政副使內推陞兩寺少卿於叅議
僉事內陞補 詔從之

楊一清又奏兩寺卿佐等官赴京考滿朝覲一切禮儀班
序恩典或照兩京太僕寺堂上官事例或止照布按二
司官例擬議通行遵守以杜將來紊亂僭踰之弊仍乞
將各寺卿少卿寺丞賢否考語陝西止聽臣開報部院
以憑黜陟不必撫按干預山西遼東甘肅等處仍止撫
按開報不必二司干預其首領屬官賢否止憑堂上官
填註寺丞乞照京官事例凡有違犯叅奏拏問不許徑
提下吏禮兵三部尚書馬文升張昇劉大夏等會議兩

寺官皆如兩司官體統餘悉如擬覆奏 詔曰是兩寺

官員體統都准如議行永為定例各官果有政務脩舉

功績顯著的你每斟酌推舉陞用不必拘定常例

十八年楊一清奏請苑馬寺不拘少卿寺丞添設一員廣

寧黑水清平萬安四苑各添設圍長一員部覆奏添寺


丞一圍長各一 詔從之

嘉靖二年巡按陝西御史陳講奏請於行太僕寺少卿之

內每添一員分管地方一在延綏一在寧夏住劄其正

卿專理堂事并巡視附近固原等衛監苑孳牧馬匹其

寺丞點關洮河漢中潼關鳳翔等衛一應住劄罰馬降



級事宜又以苑軍頑悍不法議行脩蓋社學射圃揀選俊秀子弟教育其中隨資性所近教以文學武舉各官課試以期於成仍量免養馬示優異

二十九年陝西巡茶御史劉崧條陳馬政內一款令陝西行太僕寺苑馬寺甘肅行太僕寺今後恭遇萬壽聖節比照南京太僕寺等衙門事例每年輪流一寺堂上官齋進表文其餘二寺類附下年挨次周而復始冬年等節亦各輪差屬官

三十一年正月初苑馬寺卿原設於遼陽去本苑三百里遼東守臣以三衛民繁事多開原兵備不便遙制奏准

以本寺卿張思移駐本苑兼轄金復蓋州三衛軍民

四十二年五月薊遼總督等官楊選等奏遼東苑馬寺卿政事甚簡而金復蓋三衛南涉大海為醜虜垂涎之地宜令苑馬卿量兼僉事銜帶理兵備事官不另設而事可兼濟甚便兵部議覆報可

國朝典彙卷八十

都察院右僉都御史臣徐學聚 編輯

吏部 四十七

鹽運司

丙午二年 太祖置兩淮都轉運鹽使司

吳元年置兩浙都轉運鹽使司

洪武六年正月置河間長蘆都轉運鹽使司

十二月設河東陝西都轉運鹽使司

五年置四川納谿白渡二鹽馬司四川茶鹽都轉運司

六年革茶鹽都轉運司

十三年定都轉運司正四品後改從三品儒學惟河東有之制如府

建文中改廣東鹽課司爲都轉運鹽使司靖難後復故

永樂九年四月宥兩淮鹽運司副使劉季篾罪命服士服

隸翰林院修書

正統間耿九疇以禮科給事中出爲運司同知節儉嚴肅無毫髮私吏胥豪商勢家凜凜不敢肆丁內艱鹽場數千人詣闕乞留陞都轉運使嘗坐水旁有童子曰水清不如使君清已而被誣逮下獄得釋後以副都御史清理兩淮鹽法

終

國朝典彙卷八十一

離

都察院右僉都御史臣徐學聚編輯

山西按察司按察使臣耿如杞訂正

吏部 四十八

府州縣

吳元年七月 太祖除郡縣官二百三十四人語中書省

曰新授郡縣官多出布衣到任之時或假貸於人或侵

漁百姓不有以養其廉欲其奉公難矣遂賜予道里費

洪武元年詔中書省自今除府州縣官賜銀十兩布六疋

七月徵天下賢才爲守令厚賜遣之

勅諭新授北方守令曰牧民之任當愛其民况新附之邦
生民凋瘵不有以安養之將復流離失望矣爾宜體朕
意善撫循之毋加擾害簡役省費以厚其生勸孝勵忠
以厚其俗能如朕言不但民受惠於汝汝亦獲循良之
名矣命中書給賞以勵其廉耻

九月 上諭羣臣曰昔元時不重名爵或以私愛輒授官
職名雖易得實無益實事徒擁虛名而已朕今命官必
因其才官之所治必盡其事所以然者天祿不可虛費
也又嘗思昔在民間時見州縣官吏多_無恤民往往貪
財好色飲酒廢事凡民疾苦視之漠然 賞怒之故今

嚴法禁但遇官吏貪污蠹害吾民者罪之不恕卿等
體吾言若守已廉而奉法公猶人行坦途從容自適苟
貪賄罹法猶行荆棘中寸步不可移縱得出體無完膚
矣可不戒哉

大將軍徐達既下山東郡縣 上卽遣官往撫輯之諭之
曰百姓安否在守令守令之賢以才德有才則可以應
變集事有德則足以善治然爲治之道亦有難易當天
下無事民狃於奢縱治化爲難及更在亂斯民凋瘵撫
綏尤難元之所以致亂者雖上失其操柄亦州郡官吏
不得其人懦者不立流於縱弛强者急遽發爲暴橫以

生亂階今新附之民望治猶負疾者之望良醫醫之術有攻治有保養攻治者伐外邪保養者扶元氣今民出喪亂是外邪去矣所望生養休息耳卽扶元氣之謂也有守令之寄者當體予意以撫字爲心毋重困之

上海民錢鶴臯作亂執華亭知縣馮榮榮不屈囚置獄中及徐達遣指揮葛俊擒鶴臯榮始出獄卽爭於俊曰反者鶴臯耳餘皆良民卽有從者亦皆迫脅將軍必欲加兵榮請先歿有邑無民何以爲治俊從之全活甚衆

十二月以宋冕爲開封知府 上諭之曰元以六事責守令徒具虛文今喪亂之後中原草莽人民稀少所謂田野闕戶口增此正中原今日之急務若江南則無此曠土流民矣汝往治郡務在安輯人物勸課農桑以求實效勿學迂儒但能談論而已

以呂文燧爲嘉興知府文燧永康人元季處州盜陷永康文燧起義復其邑 上克婺州乃籍兵甲詣轅門降

上大喜特命爲左副元帥兼知縣事已知廬州府改知嘉興松江民作亂襲嘉興覘知之走使告李文忠移兵擒之諸將欲屠城文燧爭曰據城者賊也民何罪釋不屠民德之滿三載入朝奉詔持節諭闍婆國次興化疾卒明年嘉興佐貳以下坐鹽法歿者數千人有司以嘗

署名公牘例籍其家。上特詔歸之曰吾知呂文燧誠信人必不圖姦利且歿於使事可念也皆釋歸家。四年六月以方克勤知濟寧府事克勤至官榜於通衢諭上愛養元元之意民有不平皆得詣府自言吏胥不得呵禁葺廟堂闢射圃日再視學親爲正句讀較射禮屬縣各立社學凡數百區民墾廢田者閱三載乃稅丁產科徭均定等則凡有役使務詢民便尤慎於庶獄月錄日省不使久淹永嘉侯朱亮祖將舟師數百艘北征河涸舟膠亮祖卽趣五千夫浚河否則以軍法論克勤不忍煩民泣禱於天夜大雨數尺舟竟去。

十二月漢中知府費震多善政值大軍平蜀後陝西旱饑漢中尤甚鄉民多聚爲盜莫能禁戢是時府倉儲糧十餘萬石震卽日發倉令民受粟自是攘竊之盜與隣境之民來歸者令爲保伍驗丁給之賴以全活者甚衆至秋大熟民悉以粟還倉。上聞而嘉之已以他事被逮至京。上曰震良吏也釋之爲牧民者勸震初爲吉水知州亦以寬惠愛民有善政後累官至戶部尚書。

五年三月以魏觀爲蘇州知府。上念姑蘇爲京輔重地經張士誠之亂荼毒罔有寧宇廷臣咸薦觀有治才乃出知蘇州府旣蒞事懲陳寧苛政鋤暴樹良寬而且肅

敬老恤民大建學舍乃闢宣聖廟庭舉鄉飲酒禮聘郡
賢士周南老王行徐用誠與教授貢穎之定儀節高啟
王彝張羽闡文學郡多耆耄崑山周壽誼年百有十歲
吳縣楊茂年九十三林文友年九十二皆延至之禮成
彬彬可觀壽誼還躬餞諸郊再拜送之觀者如堵時戎
事倥偬百物彫耗禮文衰落乃能力挽躬行風教勃興
封部皞然課績爲天下最 上嘉之陟爲四川行省參
知政事蘇父老上疏願留仍命觀還郡七年觀以舊治
爲士誠竊據且郡多水患乃修府浚河以壯士觀以資
民利御史張度誣其興旣滅之基遂與高啟等俱獲罪

上悔之命所在致祭 皇太子諸王哀矜有加乃歸葬
於蒲圻燈窩山

繁峙縣主簿于文采言山西行省并按察司官吏事多不
法按有驗 上曰文采職居下僚能不避權勢舉言其
非可嘉也宜陞擢以旌異之命爲大同知府

七年遣靖海侯吳禎往浙東收籍方氏台溫明三郡故兵
禎旣至三郡無賴惡少挾私逞怨蔓引平民富室爲兵
瀕海大擾寧海知縣王士弘曰吾寧獲戾罪不可誣良
民爲兵上封事辭甚懇切 上卽詔罷之三郡之民賴
以復安士弘潞州人擢南雄府通判卒於官三郡之民

悲思之

六月 上命吏部曰古稱任官惟賢才凡郡得一賢守縣得一賢令足以致治如潁川有黃霸中牟有魯恭何憂不治今北方郡縣有民稀事簡者而設官與煩劇同祿入供給未免疲民可量減之於是吏部議減北方府州縣官三百八人

九年六月陞彭州知州胡子祺爲延平知府子祺初擢御史上書請都關中 上稱善尋陞廣西僉事克舉憲典多平冤獄聞元祐黨人碑尚在融州巖谷中出而碎之改知彭州值元末兵荒野多暴骨咸爲聚瘞州有滌江諸堰築自秦時歷代皆用鐵石修築春夏水溢旋復衝決子祺以竹木代之費省而利博民甚便焉至是知延平善政尤多踰年卒於官

七月以御史郎敏爲饒州知府敏之官有樂平縣民詣闕訴邑之大姓五十餘家謀逆者詔率兵捕之敏廉得告者素無賴以假代諸大姓不獲故重誣之敏爲奏辯詔誅無賴其被誣者釋之

十月濟寧知府方克勤卒克勤浙寧海人弱冠編窮濂洛關閩遺書至正間嘗入場屋言國家利害無所顧忌有司不敢取遂入山不出國初歷仕濟寧多善政曹縣知

縣程貢以不職被笞誣奏克勤用苦倉蘆葦下御史楊
通濂審通乃貢之故人如其奏遂逮克勤至京師次子
孝孺願以身死而克勤年僅五十君子惜之
十年以贊禮郎道同爲番禺知縣同河間人
以才幹舉性剛毅廉潔堅執公法視民如子民賴以安
永嘉侯朱亮祖至數以威福撼同同不爲奪反借他事笞同同遂歷
數其事而奏之疏未至亮祖亦誣同抗訕先聞
上不知其由先命使取同首級適同奏亦至
上特遣使宥之二使同日繼至而同已先死邑民甚惜之

十三年六月以蘇恭讓爲漢陽知府恭讓爲治簡而明嚴
而不苛漢陽密邇省城凡徭役科徵倍於他郡故政繁
而民困前守無敢言者恭讓每遇重役必懇請上官簡
省民賴以安先是有趙廷蘭者知漢陽縣愛民如恭讓
朝廷嘗遣使下縣取陳氏散卒他縣率多以民丁應數
規免已責廷蘭獨爲民辯明民得不擾漢陽之民言郡
守則稱蘇恭讓言縣令則稱趙廷蘭云

九月詔戒守令曰朕君主華夷十有三年立綱陳紀所以
安民曩因奸臣弄權恣行不法內外官貪賍蠹政以干
邦憲邇來有司皆出編氓深知稼穡艱難民生疾苦是
用授以職任相與圖治當竭誠報效無蹈前非其有舊

任未代者若仍肆意妄行則國有常憲
十月吏部引選國子學生二十四人命爲府州縣官
召至前諭其撫民盡職

十七年 上諭禮部臣曰州縣之官於民最親其賢不肖
政事得失視民之安否可見朕嘗命縣考於州州考於
府府考於布政司各所以臨察其考覈以憑黜陟昭示
勸戒今上下之政惟務苟且縣之賢否州不能知州之
賢否府不能察府之賢否布政司不能舉善無所勸而
惡無所懲朕今命以八事爾禮部其爲榜示天下其一
州縣之官宜宣揚風化撫字其民均賦役卹窮困審寃

抑禁盜賊時命里長告戒其里人敦行孝弟盡力南畝
毋作非爲以罹刑罰行鄉飲酒禮使知尊卑貴賤之體
歲終察其所行善惡而旌別之其二爲官府者當平其
政令廉察屬官致治有方吏民稱賢者優加禮遇紀其
善績其有關茸及蠹政病民者輕則治之以法重則申
聞黜罰然不得下侵其職以擾吾民其三布政司官宜
宣布德化考覈府州縣官能否詢知民風美惡及士習
情僞奸弊甚者具聞鞫之如所治不公則從按察司糾
舉其四凡民有犯笞杖罪者縣自斷決其實以聞其五
犯徒流罪者縣擬其罪申州若府以達布政司定擬其

六有犯死罪者縣擬其罪申州若府以達布政司布政司達刑部定擬雜犯者准工贖罪真犯者奏聞遣官審決其七凡諸司獄訟當詳審輕重按律決遣毋得淹禁其八民間詞訟務自下而上不許越訴以上八事頒布天下永爲遵守

十八年七月丹徒知縣胡孟通縣丞郭伯高以事當就逮耆民數十人詣闕疏其撫民有方上特命釋之仍遣使往勞以酒

十月陞宜興縣主簿王復春爲常州府同知遣吏科庶吉士楊靖齋勅勞之曰朕觀歷代名臣其流芳至今而不泯者由其竭忠以事君務公以福民生不苟且以營利歟不屈節以喪名其泛泛之徒弗勵名節是以生無益於時歟無聞於後深可惜哉今以宜興縣主簿王復春不肯腴民之利以徇上官之欲觀其所言實爲公論方今有司鮮有如此者特遣使齋禮以勞就陞爾奉議大夫同知常州府事爾其竭乃心力以光初志

十九年二月常熟知縣成萇奇有府吏詣縣徑由中道入公堂萇奇怒其越禮執之事聞上嘉其能命遣使以酒勞之

四月陞慈谿知縣秦仲彰爲寧波知府降知府李仲文爲

慈谿縣丞時仲文遣吏馬仁坐行縣違法仲彰械仁生
至闕下 上嘉之故陞仲彰而降仲文

五月 上聞崇德知縣畢輝縣丞齊博剛正能官遣行人
齋勅往勞之

常州府官范好古言行人王良至郡奉職不謹贖貨無厭
上諭禮部曰朕觀自古材智之士不屈於無能之下故
克流芳於後設使居官蒞事之時屈於常人之下無補
於君無益於民壞法亂政何所不有今好古乃能守邦
憲以遵朝廷發奸貪以安黎庶其不屈於無能之下可
見矣爾禮部卽遣人齋禮以勞仍令械良至京罪之

慶水縣民有賣卜者嘗干謁富室不應所求乃詣闕告大
姓陳公望等五十七人聚衆謀亂命錦衣衛千戶周原
往捕之知縣倪孟賢聞原將至密召父老詢之父老皆
曰無是事孟賢又微服往察見其男女耕織如故乃歸
謂僚屬曰朝廷命孟賢令是邑惟欲撫輯斯民安于田
土今使良善者受惡逆之名豈朝廷命孟賢意耶卽具
疏聞復令耆老四十人詣闕訴其妄 上命法司論妄
告者賜耆老酒食及道里費遣還孟賢南昌人
六月詔天下有司敬老尊賢報功崇德恤孤賑寡
七月蘇州府吏錢英姦宄不律知府王觀等廉得其狀筆

歿之以聞。上遣使齎勅諭之曰：朕聞居官蒞政設施不一，然非威無以治，下非恩無以得衆。惟中正之士秉公平之心，勵廉潔之操，臨民治政，恩威兼行，吏胥徒卒焉敢侮慢。朕常戒勅諸司，鮮能如命。惟爾觀及同知曹恆，經歷王昉，能秉公心，行正道，將奸吏筆歿蒞下之方得矣。政令必行，奸邪斯遠，境內肅清，民安有日。今特遣行人齎勅，并禮以勞爾。其益勵厥志，用成嘉績。故諭。

二十一年正月，復前諸城知縣陳允恭官。上諭吏部曰：爲國以任人爲本，作奸者不以小才而貸之，果賢者不以小疵而棄之。奸者必懲，庶不廢法；宥過而用，則無棄

人。陳允恭前任諸城以簿書之過謫戍雲南，比有言其治縣時能愛民，夫長民者能愛民，雖有過可用也。

二十二年二月，遣行人齎勅賜平陽知縣張礎曰：朕惟郡守縣令，民之師帥，其職惟愛民。乃者通政司言浙江金鄉衛因造軍器，意在擾民。爾平陽縣知縣張礎執法不從，卽具以聞。朕深嘉歎，縣令之職實稱焉。特遣使以鈔三十錠，內酒一封，往勞以旌爾能爾其領之。

二十四年九月，復以吏部考功主事周丹爲新化縣丞。丹永嘉人性明敏，有治才。初由進士授新化丞，在官以廉勤稱，門無私謁。吏卒不敢欺，驗民貧富及丁稅多寡，第

爲上中下籍記之遇有賦役隨輕重使之故民不擾而
事易集至於獄訟文牘之務皆躬理之吏胥不得爲奸
罷諸役作民晏然安業由是流民之歸者益衆滿考課
最陞考功主事旣而縣民蕭俊等詣闕言自本官去職
縣丞復擾民不安業乞令再任 上命吏部俾復爲縣
丞仍令禮部宴賞而遣之

二十五年曹縣主簿劉郁因事逮繫耆民楊德等詣闕言
其廉勤愛民 上喜曰爲政不難得民心爲難主簿有
善政及民故民愛之卽命復其官因謂廷臣曰自古人
君所患者惟憂澤不下流情不上達今民以主簿之賢

來言於朕朕宥之仍與治其民上下之情無所壅蔽矣
二十六年二月建陽知縣郭伯泰縣丞陸鎰爲政不避權
勢 上遣使齎勅諭之勞以酒禮特命陞伯泰泉州府
同知鎰福州府通判

金壇縣丞李思進坐事當逮邑民丁原德等詣闕言李在
官多善政乞畱 上遣使齎酒勞之

二十七年三月有儒士初拔知縣陞辭 上問之曰試言
蒞民之道何先對曰教化爲先曰教化何施對曰獎勵
之 上曰治民固以教化爲本而身又教化之本長一
邑則係一邑之望民率視已以爲則已身不正民將何

法雖多爲獎勸彼不見信故曰以身教者從以言教者
訟爾其試之

二十九年十二月永州知府徐彥誠與齊東知縣鄭敏等
十人先後坐事逮獄其耆民具列各官善政詣闕以請
上嘉之復其官賜襲衣靴鈔遣還仍給耆民道里費

國初有王興宗者與葉春並爲阜隸事孝陵 上以二人
老成不貪以春爲鸞儀司副使興宗爲金華知縣李丞
相言興宗阜隸奈何爲令 上曰興宗勤而不貪又善
處事儒與吏不及也何有於縣歷陞南昌通判嵩州知
州懷慶知府會蘇乏守 上令胡丞相擇人未及擬請

上曰莫如興宗改守蘇州有善政陞河南布政使老歸
州縣父老有詣闕上縣官善政當能任而保留者 上賜
手勅獎勵復職加賜衣幣謂侍臣曰郡縣之治自守令
始朕向在民間常見縣官由儒者多迂而廢事由吏者
多奸而弄法蠹政勵民無所不至遂致君德不宣政事
日壞加以凶荒弱者不能聊生强者去而爲盜此守令
不得人故也今縣官能爲吾撫循百姓達吾愛養斯民
之意得其歡心豈不深可嘉尚且爲政以得民心爲本
使守令皆能撫民天下何憂不治賞而勸之非濫恩也
有國子生初任陝西知縣或告其嘗受民財刑部逮問之

上曰爾以書生受民社之寄不能廉潔律已受汚辱之名爲父母羞朕念年少更事未多特宥還任爾其改過自新力行爲善庶有立於將來

靖難後以保定知府維僉守城有功陞刑部尚書掌府事永樂三年正月諭天下牧守之官曰朕卽位以來仰遵成憲惟欲民安物阜風淳俗美刑措不用夙夜兢兢不敢怠寧尚慮天下黎民之衆有未寧厥居者爾等皆牧守之官必思所以愛養之毋殫其財毋疲其力毋爲貪墨毋肆暴虐教之務善以遠刑辟導之務本而棄末習如民皆安居足食斯德行典刑罰措而天下治爾亦將有

無嘉之用欽哉

七年六月以汶上知縣誠祖爲濟寧知州仍掌縣事祖解州人洪武末以人才知汶上孝成敦厚勵志廉公平賦均徭勤於賦字政清訟簡境內稱安 上過縣稱爲循吏因撫其背曰何以得民心如此降勅褒獎賜上尊一織衣紗衣一襲鈔千貫祖遂繡御手於衣背在任四十八年壽百有十五歲汶人立祠祀之

七月給事中黃惟正言長洲嘉定二縣政務繁冗而知縣江浩黃儼皆由監生始仕與懦無爲請改用能者 上顧權吏部尚書方賓曰人材當隨其高下而任之譬如

舟車任載倍其所受則必敗蘇松繁劇誠非新進庸才
可辦浩等卽召回改用別選老成諳練者任之自今繁
簡郡縣皆宐考察才力而受之庶不枉人亦不廢事
八年二月廣德州知州楊翰以公事稽程逮京耆老二百
餘人詣闕言翰善撫字乞貸罪還職 皇太子監國以
小過可恕遣行人就道宥之復職仍賜翰鈔三百貫
三月清流縣耆老赴闕陳刑部員外宋忠前知清流勤於
撫字政平盜息乞復任 皇太子陞忠汀州知府
滁州知州陳璉以治最聞 皇太子召至京州民赴闕乞
留特陞楊州知府仍掌州事賜襲衣及幣命禮部宴之

九年二月吉水知縣錢本中卒本中武進人讀書曉律洪
武中以人才舉授故城知縣改元城歷著賢聲再改吉
水豪民宿吏素爲民害者本中至捕其尤者一二流徙
遠方邑中肅然新壇壝學舍躬教諸生旌別勸率政務
清簡不任刑罰嘗有盜聚山谷聞時出劫掠郡守欲兵
之本中單騎詣賊壘諭以禍福衆皆信服卽相率縛首
賊至官會赦量免本中清操苦節門無私謁妻子布衣
蔬食僅足朝夕註誤罷官學士胡廣力薦其守已愛民
遂復知吉水民間本中復來空閭井老幼奔走迎拜未
幾以疾卒民哀慕之留葬吉水爭趨負土營墳

十年正月 上諭吏部尚書蹇義等曰令守郡邑之長昔人每戒數易益牧守之寄甚重須久於其職比聞諸司以造作雜務輒差正官意在成事之速此俗吏不識事體自今一應公務不許擅差守令俾專職理民

十三年七月 上諭內外諸司官員朕祇奉天命統承皇考鴻基卽位以來宵衣旰食兢兢業業廉謹幹濟盡誠謁慮愛恤軍民者有之而關茸無爲貪污壞法酷害軍民者有之是致軍民受其毒害困迫不勝蓋由朕之不明任用非人以致此也且如灤州不才官吏指以官辦爲由巧立名色以一科百以十種萬所得贓物各分

入已民人受害怨歸朝廷天地鬼神不容致使敗露已該凌遲處死家產籍沒父母妻子給配今後諸州官吏敢有仍前貪贓壞法虐害軍民必殺無赦其軍民今後有合辦差撥稅糧等項各要依期辦納敢有頑猾過期不行辦納者事發亦皆處以重罪

上諭都御史李慶曰朕屢戒郡縣官不許一毫取民煎灤州知州何敬誅求剝削已寘諸法近代州知州安擯武清知縣李潛等仍蹈覆轍饕餮貪殘無異於敬皆寘以法爾宐備錄所犯以示牧民者俾知所警懼

十八年衡州府同知方素易坐累卒於獄中素易樂平人

洪武中爲盱眙知縣陞金華府同知治行益著永樂初坐累滴戍興州未幾驛召至京以左通政奉命諭交趾叛寇陳季擴還奏稱旨復奉命往思州廉察田宗鼎等罪狀悉得其實還除衡州府同知往捕桂陽州峒寇龍卯銘衆詭言卯銘已死素易不信已而果獲送京師有舖卒訴年老爲虎所噬素易爲文檄山神明日虎死道側後有告衡州民匿谷庶人榷財貨不送官者上官併劾素易不舉坐是死獄中人多惜之

十月辰州府同知劉叔恣廬陵人初爲沅陵知縣以愛民爲務勤於撫綏縣介溪洞先是民多困徭役竄山谷叔恣至流徙者悉歸復業有爭訟不治以法爲開諭再三心服而後遣之陞北京行部員外郎沅陵民累陳乞還叔恣遂陞辰州同知一州七邑之民得叔恣如得父母及建北京宮殿率郡民就役歲餘卒於北京郡民在役者皆悲慕之具殮祭役滿而歸相率載其喪塋辰州二十二年五月濬縣蝗蝻生知縣王士廉齋戒率僚屬督民禱於八蜡祠士廉以失政自責越三日有鳥萬數食蝗殆盡皇太子聞而嘉之顧侍臣曰此誠意所格人患無誠耳苟出於誠何求不得

處州知府謝子襄卒子襄新淦人洪武末以人才薦授青

田知縣實心爲政上下感孚陞處州知府郡多虎及早
理子襄禱於神大雨二日蝗盡死虎遁去嘗有盜竊官
鈔卽投檄城隍盜方閱所竊於室忽疾風入室捲墮市
中因遂獲盜有盜牛鬻於市將屠之牛逸至于子襄前
俛首若訴者遣人訪問得實追還其主軍校吳米嘯聚
山谷時出爲民患朝廷發官軍二千勦之處人大恐子
襄適至止軍城中毋出以計掩捕之兵不勞而民賴以
安先後歷官三十年不以家累隨

九月陞靈璧縣丞田誠爲州判官仍佐縣事誠九年考滿
赴京父老詣闕言誠居官廉能撫字有方乞復職 上

諭吏部尚書蹇義等曰縣官親民苟得人當加秩而久
任之俾一縣蒙福今民旣願留之其政可知遂有是命
十月興化縣民奏知縣李遜苛刻苦民且有子貪黷不可
堪錄其贓金銀數百兩錦綺數百疋他物稱是皆赦後
所犯併執以聞 仁宗命付都察院鞫之諭都御史劉
觀曰朝廷擇守令使養民乃厲民如此父爲之不足又
縱其子民何以堪且赦後不可改是終不改矣必論之
如律

洪熙元年 上召大典苑平二縣官諭之曰朕卽位之初
首罷不急之務以紓民力爾爲京縣親民官正宜加意

撫綏使民先受其惠比聞在京百姓猶有困於徭役者此皆爾等不職之故昨勅羣臣詢民瘼固有知而不言者亦有欲言而不知者爾切近民非不知也而亦不言何也今與爾約三日凡民間何事便何事不便悉具來聞朕爲爾處置若復坐視不理必罪不貸因顧侍臣歎曰朕憂憫百姓蚤暮不怠而一城之中猶上下不通如此何況數千里外哉古人所以戒無逸也

五月貴池縣典史黃金蘭以考績至京邑父老詣闕言其施政寬厚有愛民心請復其任上曰能致民數千里乞留是不負朝廷任使陞本縣知縣

六月安平縣丞耿福緣累以冗員當汰民懷其惠累奏乞留上諭吏部曰州縣官愛民如子則民亦愛之如父母若貪虐無道民視之如仇讐豈肯保留至於再三不已其以福爲知縣

七月平度州同王璠以冗員去昌邑主簿劉整以舊官代還民皆言其能恤民瘼戢吏弊請復其職上從之九月長清知縣薛慎以親喪服闋縣民相率詣闕奏乞復任吏部尚書蹇義以聞且言長清別除知縣已久卽如民所言又當易之上一曰必其不如慎故民求舊國家任守令但欲其得民心苟得民心雖屢易何害

宣德元年五月復黃子威為松江知府先是子威以親喪去官大理卿胡槩巡撫至松江郡民千餘人言子威蒞事公勤治民有方稅糧無虧訴訟不作願得其復任槩以聞上謂吏部尚書蹇義等曰朕聞松江煩劇難治渠能得民心如此必是有才其從之又顧義等曰有才之人如又有德斯尤難得卿等亦聞其德行何若義對曰其才蓋屢聞之德行臣等不能盡知也

二年三月 上嘗讀漢書循吏傳有感因為序論曰班固作西漢書載循吏文翁王成黃霸龔遂朱邑召信臣六人然觀其事興學校勤勞來勸課農桑修舉水利恭儉

愛人而已非有奇才異能以傾駭人之視聽然而傳之者何哉以其奉職循理而民自化異於尚威嚴以為治者自古有天下者皆以民為本舜禹之相戒亦曰德惟善政政在養民水火金木土穀惟修正德利用厚生惟和而已夫既有所養又有所教而後民生遂民性完然治天下之民必用天下之善士此後世郡守縣令之職所由重也夫一郡一邑其地環千里百里其民以千萬計而付之守令者欲其教養之而已教養之道農桑學校而已農桑之業修則民足於衣食而遂其生學校之政舉則民習於禮義而全其性如是足以為善治矣然



而世之才能之氣或不知務此往往任智術利威嚴苛
刻削急於是民受其弊此趙廣漢輩所以不得爲循吏
也今天下之郡邑多矣予惟師舜禹之道以教養斯民
故于守令之選加嚴焉詩曰豈弟君子民之父母安得
皆有如六人者布滿天下郡邑哉

三年十月常州府同知張宗璉卒宗璉吉水人以庶吉士
授刑部主事嘗錄囚廣東人稱長者以其恤民改常州
府同知視民如子時朝廷遣御史李立清軍銳意得軍
爲功凡軍戶絕者必取同姓人酷刑使承宗璉不阿御
史意遇有誣枉必力辯理御史怒其異已數詬辱之宗

璉憤鬱疽發背歿歸屬邑民皆哭送之立祠江陰之

君山

五年五月以况鍾爲蘇州知府鍾以吏員事禮部尚書呂
震震薦其才授禮部主事陞郎中時郡守多缺命廷臣
薦舉選擇鍾在薦選知蘇州府賜勅乘傳之任初至郡
佯不解事諸吏抱案環立請判鍾顧左右問吏吏所欲
行止鍾輒聽吏吏大喜謂太守愚越三日鍾乃召諸吏
詰曰某事宜行若顧止我某事宜止若顧欲我行縛諸
吏拷掠投庭下輒歿者數人諸吏又皆大懼謂太守神
明鍾乃盡覈屬吏斥貪墨者五人庸懦者十餘人未幾

大旱既發預備糧賑農俾得盡力於田畝復與周忱講
究收糧法由永樂間轉輸北京餉道遼遠糧長以一徵
三除正供及僦車船費盡爲糧長乾沒議別立糧頭同
收受互覺察除免舊徵三之一以其二之一爲轉輸之
費餘皆入濟農倉爲來年經費本是年馬草米數十萬
石及諸年夏稅折布絲數十萬斤絹數十萬疋小麥數
十萬石及雜出供費並代以餘米上無逋事下無橫科
民大悅每旱又輒發此餘米賑活輒數萬人二十餘年
積弊不戮一人而盡除民接遞終歲在官不得負販鍾
敘丁差歲不過二日盡罷其在官者置綱運簿防運夫

侵盜又致館夫簿防非禮需索綜理周密簡約易行大
抵鍾爲守專屬豪狡拊良善勢家恣犯法立夾杖下吏
民大驚奉約束

以趙豫知松江府豫安肅人洪武間以生員督賦守城永
樂丁亥授泌陽主簿歷陞知府一意撫循與民休息困
窮耄稚至者咸得盡其情滿考吏民數千人請畱增秩
三品復任前後十五年清靜如一上下皆化之正統十
年吏部論天下有司治行尤著者十一人豫在上列詔
賜宴賜襲衣及致仕去吏民攀擁不得行

七月 上謂侍臣曰郡縣守令所以安民者若賢否混淆

無所激勸則中才之士皆流而忘返吏部以進退爲職亦未聞有所甄別何也因降勅申諭

九月宥曹縣知縣范希正罪令復職希正在曹得民心有奸吏詐取民財縱火延燒公廨希正執之械送京師奸吏誣希正以他事被逮縣民八百餘人訴於通政司以聞時侍郎許廓過曹縣耆民父老相率跪訴於廓廓移文吏部吏部亦具以聞時刑部方奏希正不應徑解奸吏赴部論以違制 上曰聽民之言希正君子其徑解赴部蓋欲急去惡耳君子不當論其小過卽遣復職以慰民心奸吏令刑部盡法治之希正蓋仲淹之後云


正統二年十月召溫州府知府何文淵爲刑部侍郎文淵江西廣昌人初爲御史宣德中朝廷以江南諸大郡命大臣擇京朝官出守召見文淵宴勞之賜璽書馳驛之任文淵有治才在溫六年廉靜寡慾一郡大治當時浙東守稱爲第一尋入覲召入便殿命近臣傳旨獎勵并賜御製招隱歌增秩二級掌郡事如故命甫下而禮部尚書胡濙復薦文淵宜大用故復擢是職

三年五月河南參政孫原貞奏故汜水縣典史曾泉始由進士任御史以事降黜自宣德六年到任廉謹勤能課農勸學官有儲積民無科擾歷任三年家給人足俗醇

訟簡然其所以裕民者不過用民力因地利以阜其財
 厚其生耳聖明在上郡邑率多俊乂然求如泉者不多
 得也臣至汜泉沒已三年民之懷惠至今稱之乞勅該
 部覈實原無過名追復其官以為天下士風之勸從之
 四年陞蘇州知府况鍾吉安知府陳本深祿各正三品鍾
 九載滿赴京當代軍民詣闕乞留者數萬人詔陞俸令
 復任又再期以疾卒於郡民競立祠祀之議者謂其剛
 正之氣卓特之才其清凜之操一塵不滓其執守之固
 千夫莫回一時罕見其比 本深治尚寬簡未嘗任智
 假威以馭民有抑不伸者雖三尺童皆得往白久之郡

民日耻爭訟无折節下士色辭恆謙和未始有怠容一
 郡安之至是九載滿郡人不忍其去相率乞留藩憲及
 御史以聞於 上從之增俸復任在吉安前後共十八
 年以老疾致仕既去民尸祝之

六年十一月饒州知府黃道理先以坐杖人至死為怨家
 所訴逮治至是遇赦當還職吏部以聞 上曰知府是
 牧民官當以仁愛存心今通理杖人至死仁愛安在雖
 遇原例仍處以邊郡庶暴虐者知所懲戒乃調廣南府
 八年勅大理府知府劉烈曰以爾廉平公正命長郡治爾
 宐體朝廷簡拔之意益勵乃操益勤乃事表率官屬宣



布德澤愛恤吾民審度人情因俗爲治利所當興弊所當革盡心盡力必使一郡之民衣食充足禮教興行斯爾之稱所屬官員果有貪淫不法蠹政害民情狀昭著者五品以上其實奏聞其餘爾卽提下差人解京其餘罷軟老疾不勝任者亦開具奏來寮佐官及所在衛所官或倚恃豪強非分害民明指實跡奏聞一應公差之人但有生事需索爲民患者卽舉問如例

八月蒲州知府員缺巡按布政爲民保判官張廉守法愛民宜陞用吏部言躡等難允 上曰能得民心卽良有司正當旌擢以爲民牧者勸何躡等之有

九年四月交河縣耆民劉中等伏闕奏保典史楊貴廉正勤能堪任知縣章下吏部尚書王直等言貴以吏發身難勝民社之寄 上曰既有民人奏保宜順其情若拘以類則用人之路狹矣成湯立賢無方所以治化隆盛卿等宜悉朕意

七月巡按浙江御史孫毓奏臨海等縣民蔡顏等千六百餘人訴稱台州府通判周旭鑑嚴明勤慎能鋤強扶弱民安盜息鄰邑軍民亦咸愛慕乞陞知府吏部言於例難從 上曰知府會舉政欲得人今旭鑑能息盜安民雖鄰邑亦愛慕非得人而何其陞知府毋以例拘

閏七月河間府同知廖謨廉能公正撫字有方民素愛之至是知府缺員所屬州縣連章奏保謨堪任耆民黃仲禮等又具績狀伏闕以聞上謂吏部曰有惠者必得民心今一郡民心既不釋謨非有惠政何以得此其卽陞爲知府以慰民望

十二年二月下霸州知府張需獄謫戍邊需才長治民先佐鄭州有聲洎守霸見民游食者多每里置簿列戶各報男女大小口數派其合種粟麥桑棗紡績之具雞豚之數徧曉示之暇則下鄉至其戶簿驗之缺者罰之於是民皆勤力無游惰者不一年俱有恆產生理日滋後

朝覲至京遂受旌典尋畿內蝗作捕之有法吏部侍郎魏驥巡至其郡異之下其法於諸郡人皆便之有牧馬者擾其民需笞之領牧者譖於王振捕之下獄箠楚幾死竟謫戍邊

景泰五年十二月以王恕爲楊州知府恕在府屢辨疑獄歲饑發廩不俟報且給醫藥多所全活作資政書院教郡子弟科不乏人

六年逮南雄知府劉實下詔獄實以進士改庶吉士乞教陞金華府同知以廉潔直節著聲擢順天治中召修元史筆削任心無所吝承屈遜見他人書不合已意輒大

笑聲

復陸閣聞者驚愕相戒勿以藁示出知南雄南

雄

商稅巨萬實至存稅十一繕郡學補張九齡大庾嶺

松不肯私一錢未數月中貴使嶺外至南雄意得重賄
不得輒苛辱郡人擁實出中貴去至韶韶人爲言南雄
一守且驛奏中貴橫索賂辱太守事中貴懼急傳馬馳奏
實抗勅使毀勅大不敬詔逮至京下獄獄申上書言臣
蒙恩仕宦三十年不以妻子自隨餐麤衣敝欲爲國家
愛養小民不忍勞費以是觸忤天使無所逃罪 上不
復更窮治不數日竟卒獄中

八月江西巡撫韓雍薦書安知府張瑄撫州知府王守政

績於朝下吏部記之瑄屢辯疑獄痛革吏弊發奸摘
如神吉民畏服守政心民事凡漁利害心宿弊盡革罷
之郡人題其壁曰關節一毫無地入公廉兩字有天知
天順元年楊繼宗初以王翱薦知嘉興府携一蒼頭書一
篋署中蕭然如旅舍興學勸士閔農賑災夙夜不懈民
有事至郡和顏曲問盡得郡中諸豪奸及良馴狀與民
所疾苦爲調劑興革有孔御史者挾威凌有司杖笏人
繼宗榜通衢孔見之卽之旁郡去嘉興當江南孔道內
臣往來百方索賂繼宗直與菱藕曆日內臣曰我無用
此太守幸與我金錢或好布絹繼宗曰諾卽出牒取庫

金云與太監市布絹卽索金錢又出牒取庫金錢入饋
一日布絹金錢在也幸與印券附案他日磨勘內臣咋舌
不敢受

九月擢御史林鶚爲鎮江知府河東運判楊浩爲順德知
府時上勵精求治命吏部選內外臣僚爲郡守陞辭
日召至文華殿親賜戒諭燕勞及給鈔爲道里費鶚至
郡汲汲興利除害不出一言暴前人短鎮江漕河孔道
往經孟瀆險議鑿河自七里港引金山上流通丹陽避
孟瀆鶚念江迂遠多石又壞民廬墓請按京口閘甘露
壩故迹稍疏浚通舟春夏啟閘秋冬度壩道里近功力
省又不損民壞地利甚便竟停役從鶚言

六年三月調鎮江知府林鶚蘇州鶚至蘇一切簡靜卽有
建革必審覈再三吳人重鶚名旦夕責效頗笑守迂緩
已而見其深思曲算圖久遠利又稱太守康濟才也
八年四月詔復衡州知府翁世資官世資初爲工部侍郎
以主議減段疋之半貶知衡州在郡有疑獄數十人世
資悉爲直之治郡汲汲以革宿弊厚風俗爲務新廟學
修石鼓書院立便民倉凡郡政所不可少者皆以次修
舉衛帥有不循理法者世資稍抑之衛帥誣世資怨望
逮詔獄至是大臣辨其誣釋之削衛帥兩階調邊衛

十月擢束鹿知縣盛顥爲邵武知府顥無錫人初爲御史以論石亨謫束鹿豪右聞其來相戒曰是嘗劾石總兵一者其人不可犯也顥至變搏擊爲撫循吏畏而民安之未幾丁內艱民留之不可俟其服闋相率詣闕奏乞顥再任從之顥至不復用刑法有爭訟者諭之以禮輒叩頭聽受不復辯隣邑訟久不決者上官委顥折以片言各心服去時人有清如冰明如鏡之謠邑介真保二府間四境之民雖非所治亦聞風趨赴市易郊外有荒落地遂聚以成市人皆目爲清官店後歷爲左副都御史成化七年十月殺吉安知府許聰聰以吉安民好訟劫盜方熾且奉勅行事特嚴刑立威以禁制其下歿於獄者五十餘人又爲人矜傲藩臬多疾之會副使夏寅提學至吉安聰屢抗拒寅不堪回語按察使牟俸嗾寅奏發其平日凶惡及侵欺官錢諸事未及勘報適大理卿夏時正巡視江西考察官員入寅等言考聰貪酷黜爲民聰不服千戶蔣慶具以其貪酷事白時正遂委俸等執聰下獄具疏以聞巡按御史俞蓋以聰與寅有隙事當究問亦具奏上遣刑部員外李廷美會蓋勘問還奏所勘人多病歿於獄卽有傷於杖者亦非挾私所致惟侵欺罪實特擬聰監守自盜律贖罪爲民刑部以爲宐

比受贓枉法例充軍聰亦以俸等奸貪不法及誣害等情許辯不已上以聰人命數多疑廷美等有所私時蓋已代還俱被逮復遣官械聰至京仍命都察院會官廷鞫之乃比故勘律擬斬命卽處決刑科都給事中白昂等以未經審錄爲請不從且命毋覆奏遂以是日夜押赴市曹斬之廷美坐勘聰事不實降衡州府通判蓋降澧州判官寅等事俱免勘聰之歿說者謂其兇暴致禍固宜但係比律不許覆奏又乘夜行刑則以司禮太監黃高納其所厚吉安人洪僧官賄譖以聰嘗箠辱其徒至以瓦擦其首流血積恨所致人不能無議云

十四年十二月巡按江西御史沃頰奏吉安知府黃景隆淹禁凌虐故勘致歿人犯自成化十一年至十三年計三百八十七人都察覆奏命刑部郎中屠勳錦衣百戶楊綱會撫按三司官鞫治閱籍致歿者總四百十七人其無罪而故勘故禁歿者實百有六人有一家五人者有父子兄弟三四人者景隆坐凌遲罪械繫至京下法司議尋歿於獄初許聰之死景隆任同知有力焉至是下獄歿尸腐流蛆滿地猶不及收或謂有陰報云

十五年六月湖州知府李雄苛刻取民贓穢狼籍巡按御史張銳牒副使王齊按實劾奏未下會吏部調雄石阡

雄將行齊素與雄有隙乃給銳畱雄使不得行且檢其裝得金銀器皿封識之誣雄半夜斬關而出爲千戶所執銳不察復奏其事命官校崔智械雄至京下錦衣獄雄奏稱銳等挾讐害之再命刑部郎中顧福錦衣千戶謝瑛押雄往竟其獄併逮銳齊鞠治福等擬雄監守自盜齊增減官文書銳奏事不實俱坐罪有差刑科叅看福等會勘雄等事情罪輕重不倫福等亦被逮刑部各擬合坐者律雄發充軍齊革職爲民銳調梧州府推官福調永州府同知智瑛俱調邊衛帶俸

十七年三月貴州巡撫陳儼奏程番知府鄧廷瓚治績異

等吏部題覆以民夷方安其治宜久任以慰之

按程番自成化十年新設府在萬山中百具未舉加以夷獠雜聚猝難撫治初吏部求其人得廷瓚曰是前薦知梧州者至則悉心規畫凡城郭街道及廟宇廨舍以次興造榜諭諸夷獠使受約束政令公平莫不感化墾田不踰入市不擾四境宴然蔚如中州

六月致仕南安知府張弼卒弼松江人讀書不治章句獨慕古奇節偉行舉進士歷兵部郎中數以直言忤尚書張鵬出守南安平徭賦息詞訟表章先賢拆毀淫祠鑿梅嶺險梁橫浦崩湍而居者行者無不謳歌樂頌六年

不調以病乞歸民立生祠祀之

弘治二年以孔鏞爲田州知府鏞平生以忠信自勵事

英憲孝三朝皆處外所至聲績斐然知田州峒獠

倉卒犯城鏞蒞任纔三日郡兵盡已調發衆議閉門守

鏞度孤城中虛不能支遂單騎入賊營諭以恩威賊皆

羅拜謝罪且椎牛馬爲麥飯以進鏞飽啖之且止宿其

營賊皆驚服明日按轡出峒賊以數十騎隨進城鏞取

穀帛勞之賊泣謝去終鏞任不復出

二年十二月起樊瑩爲平陽知府瑩初知松江因賦重役

繁自周忱後法在人亡弊蠹百出乃考尋其立法初意

舉其偏弊而通融之以爲經久之計如清水蕩以絕富

人之兼併革收糧囤戶以潛消糧長之侵漁取布行人

代糧輸布而聽其齎持私貨以贍不足皆有惠利及民

而公事沛然以集巡撫使下其法於他州俾悉遵之以

毋憂去在官僅二載松民懷之弘治初詔天下舉異才

南工部侍郎黃孔昭以瑩應詔稱其明慎廉潔堪任臺

憲吏部尚書王恕聞之喜曰薦人當如是矣欲驟用之

而未得其所至是起知平陽府

九年十二月以吳廷舉爲成都府同知先是廷舉令順德

值屠瀆以都御史提督廣東軍務檄至督府溫言問勞

廷舉曰知縣越境奔命必有地方重事瀟乃以順德權
璫家廟工程相托廷舉曰時歎民貧一夫不敢役分金
不敢用遂辭出瀟爲別處巡按御史汪宗器亦惡廷舉
曰彼專抗上官市名遂捕縣所縱盜逼誣廷舉加以嚴
刑盜曰死吾分也不敢誣廉令廷舉囚服梏手日候訟
廷事卒得白順德之政邁古循良中外久知及瀟爲吏
部尚書銜舊怨僅遷同知尋以憂回復改松江

十五年以張鎰爲慶陽知府慶陽邊郡久不治民多穴處
不知桑麻鎰至則革吏胥之奸究徵輸之弊百事一新
且招工陶瓦甃治屋廬教樹藝暇則飾公署學校民有
殺人報父讐者鎰據法當赦憲司不從後臺議卒是之

鎰治爲諸郡第一

正德十六年十一月召用原任沛縣知縣胡守約守約爲
縣時有中官吏宣過沛橫索有司守約多裁之竟坐宣
誣奏逮詔獄褫職至是以言官薦召用

嘉靖四年濮州知州金輅侵官錢物千餘棄官歸京師巡
按御史劾奏之命錦衣衛百戶馮相逮輅輅懼以五百
金賄相得脫已又私往來倡家事覺收輅及相送錦衣
獄其贓下巡按御史覆驗皆實輅坐罪謫戍邊衛

五年二月南昌知府鄭獻上言臣前守南昌宸濠謀逆臣

首發其窩王何順之奸次擒其黨與凌進保之屬濠深恨臣遂中臣以危法法吏乘風煨煉成獄身幽囹圄及濠舉兵命囚臣別舟聲言用臣祭禱幸臣以微言諷感守者得脫械先登斬其七賊歸詣都御史王守仁具陳城中虛實守仁以爲忠相與決策攻入南昌因委臣圍守王宮頗効勞績而御史楊林乃誣臣投到於賊亾之後心跡未明歿有餘恨吏部以聞上曰瓏抗逆遇禍不陷非義又頗有斬獲功准復舊職不必再勘

七年陞金華知府張鉞爲廣西叅政管田州府事吏部尚書桂萼言王守仁區畫田寧土目先試以巡檢知州先

試以吏目知府先試以同知試三年而後實授其薦林寬爲同知蓋試知府也朝廷旣假之便宜宜遂從其議上以爲然命寬以同知掌府事俟三年有成卽陞知府鉞仍舊職

八年正月上諭閣臣曰卿等昨以重守令一事爲言夫守令親民之官此官得則民安而非堪此官者則民不安故自古重此官我祖宗亦重之卿萼吏部嚴加訪察以爲黜陟之宐不係縣令決不得陞御史給事不爲郡守決不許超爲卿佐每三年之期將可否分別等差量爲勸示六年倍之九年加倍之又命都察院嚴戒巡

按令其公舉劾秉政體上親爲按歷以稽其職之修否
不許折挫凌辱如此則守令自得以重民生或可安矣
卿等其協心詳議如可卿璉卽與同官擬旨來看

三十九年給事中曾廷芝條陳重守令四事一旌異能言
中人之情非激不勸晉漢宜有賜金之典先朝行增秩
人之令今宜令撫按表其治行高第者以示風勵一破資
格言古者用人不問其資如潁川淮揚用治最進位公
卿不問何途出也今天下惟甲科爲重由舉貢授者卽
龔黃不齒今宜一洗敝風程較功實毋得以資格軒輊
一慎銓除言人情壯多激昂老犯在得今宜察其年貌

以憑器使一驗文憑言各官陞轉非部檄至不敢離任
近有買憑奸僞非數金不授致使延遲今宜類集各省
文憑令出京回任官員順賚以便撫按轉發部議從之
四十二年七月 上諭大學士徐階曰諸臣忠善固多邪
罔亦不少如段疋常供亦復故違明限蓋誦事上玄耳
階言段疋違限原係有司貪肆以納賄爲捷徑以織務
爲無益循習致然非由誦事上玄也 皇上惟於用舍
之際審賢否核功罪辨勤惰塞苞苴之門杜請託之路
則百事皆可幹濟不止段疋一事不至違限而已 上
曰欺誦不盡無而貪肆者爲甚國虧民苦悉此等所爲


祖宗法度視為眇耳此本要冢宰力行階以示吏部尚書嚴訥訥因言為國守土而於民最親者莫切於守令請行各撫按官不待復命即將所屬貪肆有跡者以名聞聽本部分別處治上從之階復言祖宗法度本極嚴明使為臣者不以利欲蔽其良心豈至公然違犯使國虧民苦此在群臣均干天憲而大臣不能倡率百僚又不能斥去此屬其罪尤重訥在吏部殊有志守第恐請託既絕不免怨謗仰賴聖明主持耳上嘉納之

十一月詔加荊州知府趙賢三品服色俸級蓬溪知縣張希範大埔知縣張孔修五品服色俸級以賢守郡有善

政而希範孔修禦寇有功故有是命


隆慶元年祥符知縣謝萬壽數筮歿無辜撫按官惜其初任日淺奏當改調吏部議謂酷者尚留是廢法也留而他調彼民何罪空依例罷黜為酷法害民者戒從之

四年六月掌吏部事大學士高拱言廣東舊稱富饒之地近者民窮盜多皆坐有司不良所致而有司之不良其說有四用人者以廣為瘴海之鄉劣視其地有司由甲科者十之一二而雜行者十之八九銓除者十之四五而遷謫者十之五六彼其才既不堪又自知其前路之短多甘心於自棄一也嶺南絕徼僻在一隅聲聞既不



通於四方動靜尤難達於朝著有司者苟可欺其撫按
 一卽無復有誰何之一也廣乃財賦所出而又通番者衆
 奇貨爲多本有可漁之利易以豔人貪風旣成其勢轉
 盛間有一二自立者撫按旣薦之矣而所劾者亦不過
 聊取一二苟然塞責固不可以勝劾也彼見撫按亦莫
 我何則亦以爲得計而無所忌憚居者旣長惡不悛來
 者亦淪胥以溺一也以甘於自棄之人處僻遠之地豔
 可漁之利而共囿於無忌憚之風此所以善政無聞民
 之憔悴日甚而皆驅之盜賊也若不亟處獎將安極往
 歲奉旨多取進士議者謂當於此等充州縣正官之選

或間叅以舉人嚴加考第毋容雜流遷謫者得肆於
 上則地方猶可爲也然不肖者罰固可以示懲若使賢
 者不賞又何以示勸臣等廉得潮州府知府侯必登在
 郡能勸農弭盜治行爲廣中第一請特加優處以風勵
 庶官其廣西雲貴近年亦有兵革之事議處有司當視
 此爲準 上答曰邇來遠方有司不得其人以致民不
 聊生盜賊滋蔓所議甚得弭盜安民之要悉從之




從二品叅軍府叅軍一人錄事二人紀善一人未幾申
定王府官制王相府左右相正二品王傅府文武傅從
二品

是年定王府承奉司六年置王府典膳典珍二所以中官
流官爲之

按承奉司掌王府一應事有事呈長史司并護衛指揮
司發落與內官衙門無相統攝承奉正正六品承奉副
從六品典寶所典寶正典寶副典膳所典膳正典膳副
典服所典服正典服副品如承奉正副內使凡十人司
冠一人司衣三人司佩一人司履一人司藥二人司弓

矢二人各門官門正正六品門副從六品

六年九月以侍御史文原吉爲秦府右相國子助教朱復
爲燕府叅軍諭之曰王今長宜朝夕左右輔養其德二
三年後遣王之國汝等宜盡心所事取鑑於古何者爲
善何者爲不善采撫古人仕爲王臣孰能以正輔導孰
爲不能編次成集朝夕覽觀遇有所行則擇其善而去
其不善務引王於當道爾等與王言待臣下則以謙和
撫民人則以仁恕勸耕耨以省餽餉禦外侮以藩帝室
如此則能盡其職矣又曰汝等職事清簡非朝廷劇任
之比若文武全才更可演習武事發舒精神若素儒生



但謹守禮法陳善閉邪而已苟巧詐無實欺蔽諂諛此
招咎之道所宜戒也慎之

八年改參軍為長史

九年罷王府護軍府

九月秦王府武傅耿炳文兼陝西行省右丞郭承興兼陝
西行都督府僉事晉王府武傅汪興祖兼山西行都督
府同知燕王府左相華雲龍領北平行中書省參知政
事秦王府右相顧時領陝西行省右丞

定王相府左右相二人武相一人文相一人左右傅二人

武傅一人文傅一人長史二人錄事二人罷王傅府及

典義司諮議官增伴讀四人伴講四人

十一年三月命太子正字桂彥良為晉王右傅彥良慈谿
人元舉於鄉為平江教授罷歸時張士誠方國珍數聘
不就洪武初浙江參政徐本以彥良應薦奏對稱旨授
太子正字擢晉王府右傅 上親製誥文賜之彥良以
輔導之職莫先於格心乃製圖以獻晉王已改左長史
朝京師上太平十二策言多剴切 上嘉納之

十年以朱廉為楚府長史廉義烏人刻苦勵志淹貫經
傳悉領要義既而學文於黃潛以文章知名李文忠鎮
嚴州辟為釣臺書院長洪武三年纂修文史擢編修已

授經楚府尋陞長史致仕歸卒

十七年以周斌為齊王府左長史斌寧德人以鄉薦授教

授洪武十五年雲南平謨賀表稱旨賜金幣秩滿召至

便殿承顧問以質直見重明年拜司業至是陞長史輔

翼開陳一以正道丁內艱病卒

二十八年置靖江王府諮議所尋改為長史司

三十一年十二月建文授楊士奇王府審理副

建文元年二月改周府紀善周是修為衡府紀善詳靖難

三年十二月以程通為遼府左長史

永樂元年四月以岷王榘擅拘諸司印信激變夷人命吏

部悉降其王府職官

以燕府長史康汝楫為左侍郎汝楫武功人以明經任訓

導辟為長史出知安岳縣拜侍郎輔皇太子克盡其

職卒贈工部尚書

四年五月吏部尚書蹇義等奏齊府教授葉坦等三人謂


齊王所為不道坦等不能輔導為善匡救其過宜寘於

法上謂齊府僚屬前日從王來京者已察其奸邪數

人寘之於法坦等皆先自歸朝廷陳告毋一槩論之

十年正月以國子司業趙季通童子莊為趙府長史

十四年二月以蜀府教授鄭楷為本府左長史致仕



二十二年改淮府長史王榮爲吏科左給事中荆府長史曹曼齡爲翰林修撰二人侍上於春宮凡書表奏及機務文字悉專之至是不欲其去近侍故有是命

洪熙元年

以左司直金實爲衛府左長史實開化人事上東宮講說詳明隨事納誨簡輔衛王復召入西掖纂述先正格言以備顧問正統四年王薨復命爲禮部會試同考官宣德元年滕府長史姚友直事懷王王喜其恭謹上愛王爲陞友直雲南左叅議掌長史司事王薨因事至京上念舊勞擢太常卿友直名益以字行蕭山人洪武甲

戊進士

三年十月宣諭各王府長史戒戢下人勿爲罪
四年二月降漢府教授曹彥昌爲高安縣典史彥昌在府先以丁憂去後高煦敗服闋遂不起吏部移文促之始至侍郎郭璉奏彥昌在任久雖先事去亦當坐以同謀之罪上曰一時預起事今尚有釋之者矧其先事去乎不聞漢窮治楚獄濫及無辜乎彥昌但治其服闋不起降一等

五年三月寧化王濟煥奏本府舊除教授一員復起送吏部今有子五人皆堪入學請除教授俾專訓誨上命

吏部凡宗室子弟其教讀官有闕宜速遷授不可稽誤
八月陞給事中方祖爲楚府左長史九月陞越府長史周
忱爲工部右侍郎巡撫南直隸蘇松等府縣

改鄭府長史王淪爲行在戶部郎中

正統十四年九月景帝擢郕府左長史儀銘爲禮部左
侍郎右長史楊翥爲兵部右侍郎審理正俞綱爲太僕
卿審理副余儼遷僉都御史伴讀俞山爲鴻臚寺丞楊
輿爲戶部郎中

成化二年八月進士周鑑以避選王府官問遣爲民時崇
王將出就學詔吏部選進士官侍講讀鑑在選中稱病

覲免尚書王翱奏鑑懷奸不忠遂坐除名

六年三月改趙府左長史雷霖爲金華同知

弘治十六年正月吏部尚書馬文升奏各王府蕩制踰軌
非禮之爲靡所不至必選國學鄉學師儒以備講讀使
之觀聖賢之書以開爲善之路誦祖宗之訓以啟持正
之心若藩王所爲未善長史等官得從容諫正不聽者
密具奏聞郡王所爲未善教授藩王得因時戒勉不聽
者亦密具奏聞若干宮闈重事仍差內事并法司官前
去勘問上從之

正德十六年五月以興府左長史袁宗臯爲禮部尚書兼

文淵閣大學士詳輔臣考

十一月贈興府右長史張景明為太子少保禮部尚書兼
又淵閣大學士景明山陰人弘治庚戌進士事獻皇
有輔導功

嘉靖元年以興府紀善周詔為少詹事兼侍讀詔長洲人
以鄉舉授教諭選為興府伴讀遷紀善以國事草創宜
有典則以垂後世乃本祖訓及中庸九經之日為書數
千言以獻獻皇嘉之已加長史俸至是以扈駕入京
晉前官居數月疾辭轉太常卿卒贈禮部侍郎

詔郡王府教授典膳由吏部除授者歲給柴薪銀如親王
府官例其生員子弟納銀及保陞者止給本俸不給柴
薪

左都御史金獻民言各王府承奉以下不職官許各撫按
糾劾從之

八年大學士楊一清言楊士奇以審理副選編修周忱亦
自長史累陞尚書成化年雷霖以德府長史為山西提
學副使又言布政使雍泰秦府有姻亦陞巡撫都御史
乞容王官與別官一體陞用王親亦選京官吏部議此
祖宗微意如近年江西婁性足為監戒况王親縱不得
京任得仕至左右布政使官與尚書等使區區自懷重



內輕外之心則展布才猷亦足自見一清請再議吏部執不可

十二年楚王榮械爲其左長史楊天茂奏乞進散官致仕詔從王請仍命吏部覆加職例以聞部臣言朝廷名器所以示風勸此後長史等官由進士出身者歷俸三年舉人監生而下倍之果輔導有功賢能彰著者始得保陞俸級若徒苟且充位雖年久止以原職及衰老當罷卽用本官致仕毋得濫請上從之仍著爲令

十二年吏部言王府官員原無考滿叙遷事例今蜀府左長史高鵬以九年考滿事例起送宜黜詔令致仕吏部因請王府官凡稱病乞改用者並勒致仕輔導失職調者不得授府州縣親民官

三十九年十月以禮部郎中李纘刑部郎中高岱爲景府左右長史初吏部議以進士充景府長史中書舍人劉芬素性不慧或戲之曰吏部將以爾爲之芬大怒卽馳往尚書吳鵬家裂冠毀裳掉臂大詈而去鵬以聞詔逮繫拷問黜爲民

四十四年十月吏部擬奏景府長史等官改授事例長史李纘等初係吏部改除宜對品改在京諸司職事典寶正李時臣等及工正倉庫等原係常選宜改在外諸司

職事典樂良醫等官仍除補各王府員缺候缺典儀正等官仍改註各王府候缺其副儀已革者准改正職仍支原俸詔從之於是改續為鴻臚寺左少卿右長史潘進深為順天府治中審理正李秀為戶部主事紀善賈論張天鷄復大理寺副中書舍人原職餘如各例除授有差

國朝典彙卷之八十三

都察院右僉都御史臣徐學聚 編輯

工部都水清吏司主事臣金鉉 訂正

吏部 四十九

恩廕

國初因前代任子之制文官一品至七品皆得廕一子以世其祿後乃漸為限制在京三品以上考滿著績方得請廕謂之官生出自特恩者不限官品謂之恩生或即與職事或送監讀書

洪武二十六年定廕敘之例一用廕以嫡長子殘廢則嫡

長子之孫以逮曾玄無則嫡長之同母弟以逮曾玄又無則繼室及諸妾所生者又無則傍廕其親兄弟子孫又無則傍廕其伯叔子孫一用廕者孫降子曾孫降孫傍廕者皆於應敘品第降一級一正一品官廕其子於正五品用從一品子則從五品用正二品子則正六品用從二品子則從六品用正三品子則正七品用從三品子則從七品用正四品子則從七品用從四品子則從八品用正五品子則正九品用從五品子則從九品用正六品子則於未入流上等職內敘用如行人巡檢司獄之類從六品子則於未入流中等職內敘用如各

關倉庫稅課司局批驗鐵冶所官之類正從七品子則於未入流下等職內敘用如遞運所驛丞閘壩官之類一凡職官子孫許廕一人年二十五以上能通本經四書大義者敘用其不通者發還習學一應敘之人各於原籍附近布政司所屬地方銓法詔從之

永樂十七年命故大學士胡廣子種爲檢討俾在院進學洪熙初故兵部尚書金忠子達來朝時甫十餘歲上召至前撫問之命左右賜食及衣顧侍臣曰忠事先帝於兵戈艱難之際又輔朕於青宮篤學誠謹良有裨益今朕卽位而忠獨蚤歿因慨歎久之遂命吏部授達翰

林檢討月食其祿俾歸進學俟年長召用是日召故吏部侍郎許思溫之子俊亦至授太常贊禮郎俾進學翰林以待用思溫初爲北平副使從上効守城之勞者天順元年八月胡濙致仕歸嘗遣子長寧謝自敘由洪武三十三年進士任尚書歷仕五十八年中更迎駕復辟之勞及盧忠阮浪之獄乞將臣男量爲錄用得旨胡長寧陞世襲所鎮撫錦衣衛帶俸

九月故山東叅政劉琪妻宋氏奏靖難時琪守北平城有功乞令其孫繼宗入監讀書上曰賞延於世此帝王仁政之一端也琪効勞先朝而繼宗復有志於學宜允

所請但出身務在科目不許援入監先後例以倖進取十二月初國子監官生例在監十年然後許令歷事出身及是吏部奏請選監生能書者不限年月深淺送部寫本日滿選用於是祭酒陳詢言官生在監者多善書乞通選之上曰官生數多年幼必須作養而成今遽令出身非所以成之也不聽

成化元年正月國子助教李伸陳五事四言大臣非有過犯子孫應錄用者當先入國子監讀書習禮考其知所嚮往然後如例廕補上命議行

三年三月命在京三品以上官員子孫許一人送監讀書

國朝典彙卷八十三
恩廕
照監例出身有志科舉者聽若大臣果有勳勞於國出自特恩錄用其子孫者不在此限

四年二月改府軍前衛千戶于冕爲兵部員外郎冕故少保謙之子以武功蔭武職天順初謙殺冕戍邊遇赦得還至是自陳乞改文職從之冕生平聰明特達好學知禮小心勤恪善處興廢成敗之間歷官應天府尹所在以修謹廉介著稱無愧名臣子云

四月尚寶卿朱奎乞以子賓入國子監讀書科道交章劾奎違例罔上乞寘於法 上姑宥之罷其子入監

十八年五月故刑部侍郎林鶚子薇乞爲國子監生 上

不允仍諭禮部曰廕敘大臣子孫所以崇德報功示激勸也其間或有容身保位無益於時者恩典何可泛及今後在京三品以上官果政績顯著者廕一子亦必能通經書大義乃許入監毋容一槩濫授

二十一年十月南京刑部侍郎陳儼子杲乞恩爲國子監生不許再勅所司今後大臣子孫乞恩入監須審其父祖歷任久而政聲著者方許奏聞

弘治十年命廕子未仕而故准補廕無子者許廕繼嗣子正德元年正月故南京工部尚書董越妻溫氏奏謂臣夫嘗侍 先帝講讀於東宮者三年乞念舊學之勞如例

錄臣孫韓爲中書舍人吏部言越講讀年勞頗淺可如侍讀學士江朝宗之子寧例送國子監讀書有旨令再查朝宗講讀年勞蓋朝宗侍東宮甫踰年與越殊上曰越講讀既三年韓准送中書舍人習字出身其未及三年者如寧例

五月故禮部侍郎薛瑄孫葵援大學士李賢商輅徐溥例請蔭吏部言賢等官至師保瑄止亞卿加恩似宜有差上曰延賞世祿皆帝王盛德仁政也况瑄名臣蔭敘宜厚其令於中書舍人習字出身

正德三年九月兵部尚書劉大夏不爲子孫求恩澤及致仕後大臣有子不當蔭而自乞澤者言官叅駁不允因言劉大夏官居一品而子孫當得恩典大夏恥陳乞今宜舉例以崇廉退朝廷從之勘合到大夏亦不以屑意事竟不行

八年命補蔭止許一人已補而又故者不許再補先由錄蔭後中科目者亦許補蔭一人

詔凡文武官死於忠諫者蔭一子送監讀書

九月故刑部侍郎楊茂元二子爭蔭上兩斥之蔭其孫成立爲國子生

十月戶部侍郎秦金先任湖廣巡撫以勦賊有功陞俸蔭

子世襲百戶至是以新詔查革濫恩上疏辭免俸蔭
上嘉其廉退許之

巡撫雲南都御史何孟春辭免俸蔭 上諭部臣曰孟春

先以殺賊有功加俸蔭子今懇辭可謂克讓其從之

十二月錄故左都御史張敷華孫南山為國子生先是敷

華父洪以御史死土木之難 英廟追錄死事蔭敷華

送監讀書後敷華出身進士未受錄蔭故南山以為請

上以洪死事敷華素有風節特允之不為例

嘉靖元年八月御史趙兌請加故都御史孫燧副使許達

蔭秩以示殊恩得 旨二臣忠節可嘉其子各加正千

戶世襲

四年故工部左侍郎楊理先蔭子盤為國子生中順天鄉

試至是盤弟礪為其子懋陳乞吏部覆恩蔭後中科目

先年嘗有 旨准補楊懋准送監讀書

命填註錦衣衛千戶孫堪許瑒俱見任管事故事蔭敘軍


職不得管事 上念其先臣孫燧許達臨難死忠大節

表著故特從兵部之請云

六年七月命蔭故興府長史贈大學士張景明次子元藩

為國子生吏部言景明以長史贈官恩逾例外前已蔭

其子元恕例難再與 上以景明潛邸舊學特許之



七年改蔭大學士李時次孫鏞南大理寺卿宋欽孫鶴年
國子生以時長孫鑛授中書舍人欽子廷佐中式故也
九年初詔蔭尚書屠勳子應塤爲國子生應塤登進士補
蔭次子應垓亦登進士上許以應塤子鈞補蔭已而
復有恩蔭不許再補之例鈞投牒吏部以爲請言鈞補
蔭在例前上曰大臣子弟冒濫補蔭俱出因仍私弊
原非國典卽有旨查革著爲定例一應受蔭之人後
因別途出身并例後人文到部者一體改正不許再補
十四年詔復大臣子補蔭例先是黃澍以父尚書鐫錄蔭
中鄉試乞以子梓補蔭已得請時梓幼未入監尋有旨

議革例不許補至是澍以例前爲請吏部因言補蔭之
例頃奉明旨報罷但臣等考國初蔭子之制定注品
級今第送監讀書與歲貢援例諸生挨次取選蓋不過
存世祿之意而已若求蔭未經授官或蚤歿及中式者
仍宜補蔭以彰國家賞延之典得旨報可例前有旨
補蔭者送監如例後止許補一次母得槩爲陳乞
故大學士張孚敬子中書舍人遜業乞以尚寶司丞改授
其弟遜膚吏部議遜膚非長子倫序有碍得旨遜業
改司丞遜膚補蔭中書舍人

二十年七月掌太常寺禮部侍郎金贊仁以三載績滿請

國朝典彙卷八十三 恩蔭
蔭其徒協律郎陳自暹科臣言蔭未有及異姓者禮部
覆議量加一職詔與添註典簿不爲例

二十二年詔改順天府治中嚴世蕃爲尚寶少卿世蕃大
學士嵩子也嵩以治中臨民尚寶簡僻請於 上改之
掌太醫院事禮部尚書許紳歷任未及三年自以年老求
賜誥命恩蔭 上念紳久効勞動特許之

二十三年四月吏部尚書許讚之子中府經歷俱以歷俸
年深陞辰州知府讚自疏衰老其子遠宦不便乞改京
職以便省侍詔改授主客員外中書科帶俸辦事仍與
原陞服色

六月致仕大學士賈詠請以其孫恩生瑤改授中書舍人
因援累朝講讀例乞恩蔭其子爲中書舍人詔俱許之
補蔭贈光祿卿戴德儒孫希亮爲國子生德儒任臨江知
府時以宸濠之變邀擊有功陞雲南布政使未任溺水
卒隨任幼男戴濟亦故至是以希亮補蔭

故制勅房辦事太常寺卿劉棨孫瑀比例乞送翰林院習
字吏部言棨先已蔭孫瑋矣 上以瑋錄蔭係滿考其
春宮正字年老照例給與

二十四年八月蔭秉一真人陶仲文孫倣爲國子生
二十六年大學士夏言一品再考蔭一子中書舍人以無

子未承恩命請以繼孫朝慶承蔭 上以言輔政多年忠勤懋著考滿恩蔭畱俟有子時授朝慶為尚寶司丞二十七年吏部尚書聞淵子宗人府經歷思學以久當遷淵引嫌乞命在左右侍郎定擬 上許之乃改思學主客郎中於中書科辦事不為例

黜中書舍人方正為民正大學士獻夫姪也以獻夫得蔭比獻夫沒二子繁蕖方幼正代為行喪以乾沒家財為叔母夫人馬氏所訟故黜之

蔭制勅房辦事光祿寺卿談相子文明為國子生故事在京三品以上官係雜流出身者即考滿不得議蔭相再

三陳乞特許之

三十年奏准大臣應蔭子送監而未有子者許親弟改蔭二十三年正月掌太常寺事禮部侍郎徐可成疏言供事年勞兼歷三品十有五年乞恩蔭其徒協律郎管義金禮部以為非例 上特許為典簿

蔭故禮部尚書歐陽德弟昱為國子生故事身後錄蔭惟閣臣有之德子紹慶請錄其侍直勞特准加蔭不為例八月改蔭秉一真人恭誠伯陶仲文子世昌為錦衣衛百戶先是世昌已蔭為國子生至是仲文疏乞改蔭百戶而以姪孫陶仰代蔭入監從之



四十一年十一月總掌工部尚書徐杲疏言三次工完俱叨蔭子一錦衣百戶一文思院副使一鴻臚寺序班臣止有一子文燦已授百戶獨文蔭未有所屬乞令文燦得併授武階兵部以爲非例

四十三年九月改思州知府袁大輪爲尚寶司丞大輪大學士煒之姪也煒無子以大輪承蔭至是外補援例乞量改京秩許之

四十四年四月故太常寺卿兼侍讀周詔孫傳進睿宗皇帝所賜詔及御書與物同春等字兼援兩朝講讀事例奏乞補蔭詔以皇考御筆畱藏天府賜傳銀幣仍

命吏部查其應否補蔭以聞吏部言詔沒後已兩承恩蔭傳又儒授官身故與未仕不同於例不合已之

命徐杲子錦衣指揮僉事文燦世襲杲起自工匠累蔭子文煥光祿寺典簿文燦錦衣衛指揮僉事至是復以洪應殿成蔭一子錦衣百戶杲辭因爲文燦求世襲下兵部議部臣言杲效勞年久宜從其請遂有是命

隆慶二年吏部奏恩蔭官員故例仕至宗人府經歷治中俱得轉遠方知府間有事體不堪民牧者旋被罷黜非器使之道今宜度才而授如其才識卓犖能勝民社之寄當照舊陞遷其次者亦宜量陞間散衙門如五府都

事得陞太僕寺丞如宗人府經歷及治中得陞運同既陞之後如在任無過寺丞一考得陞部屬職填註中書科辦事再考三考得加俸服運同得薦陞至運使及行太僕苑馬少卿間亦得陞叅政如此庶世祿之家人人淬勵以効器使於民牧亦有裨矣得旨依議行補廕故大學士梁儲孫欽爲中書舍人初儲以一品滿九年廕次子挹未任卒欽請補廕上以其年久罷之并禁諸陳乞者至是大學士高拱言欽所請合例請許補廕自後陳乞聽臣等稽例覆行濫者叅治從之

國朝重科目一途任子多不得大位獨燕府左長史朱子濬爲北京刑部尚書禮部侍郎儀智子銘至太子太保兵部尚書學士呂原子憲至南京太常寺卿少詹事劉文恭鉉子燦至太常寺卿掌尚寶司浙江副使陶成子魯至廣東右布政使南京工部侍郎黃孔昭子綰至禮部尚書江西副使許遠子場至錦衣衛指揮使副都御史孫燧子堪至都督僉事堪子鈺至都督同知品秩皆過於所自一奇也儀銘累任翰林又以尚書掌府黃綰爲詹事學士咸極清華之選二奇也儀贈官至特進左柱國太師階勳位秩遂冠人臣三奇也陶復轉蔭子

孫至錦衣千戶世襲四奇也

尚書左丞張瑄子瑄至南京工部尚書黃昇子孫至

斷清尚書西原史籍致子孫至能文能武轉授臨將

子魯至黃東亦亦如致南京工部尚書黃昇子孫至

禮文恭慈子孫至太常寺卿掌尚書同寶同德王昭顯國親

治其清尚書學士呂鳳子孫至南京太常寺卿史籍事

子孫至南京工部尚書斷清尚書同寶同德王昭顯國親

國博重林曰一益五子孫不縣大益斷無私去其史未

國朝典彙卷八十四

都察院右僉都御史 臣徐學聚 編輯

吏部 五十

貢士 歲貢生員各一人 正月至京 從翰林院試經義四書義

洪武六年二月命禮部榜諭天下府州縣學自明年為始

各一道判語一條中式者入國子監不中式者罰之

十八年三月詔令凡府州縣歲貢生員不中式者提調官

吏論以貢舉非其人律教官訓導罰俸一年貢不如期

國朝典彙卷八十四 貢士

者以濫制論

二十一年九月詔更定歲貢生員府學歲一人州二歲一人縣三歲一人上謂禮部尚書李原名曰昔人有言不素養士而欲求賢譬猶不琢玉而求文彩夫天下未嘗無賢才顧養之之道何如耳嘗命天下學校凡民間子弟願遣入學者復其身家今定歲貢例必資性醇厚學問有成年二十以上者方許充貢爾部其申明之三十一年十二月建文罷北平山東山西河南陝西五省及淮安徐州學校貢士

永樂元年五月禮部引郡縣歲貢生入奏請如例翰林出

題考試

上召學士楊士奇至奉天門諭之曰監生之不可用皆由翰林不嚴試所致此弊已數十年非一朝夕之故今不可復循舊弊必嚴試之卽其中皆下惟得一人亦可卽無可取亦不妨但須得實才

二年禮部奏北方歲貢生員入學十年考不中式者當充吏上謂北方近年兵戈擾攘豈暇於學今考不中式者發回原學補其廢學年數以俟再試不中如例處之四年四月禮部言廣西歲貢生員考不中式者二人於法學官罰俸一年提學官當杖一上曰遠方之人漸化者淺教道未易行不可槩論夫立法雖有定論行法當量

人情有定論則民知所守量人情則民用不寬姑宥之
生員遣歸進學再貢不中式一論如法


八年七月興山知縣秦鳳言天下都邑民數多寡不同歲
貢生員宜有差等禮部議凡州縣戶不及五百者州一
年縣二年各貢生徒一人 皇太子監國從之

二十二年禮部引歲貢生奏送翰林院考試 仁宗召楊
士奇等諭曰百姓不得蒙福者由守令匪人守令匪人
由學校失教歲貢中有不通故事不明道理者此豈可
授官自今嚴考試之法不在文詞之工拙但取有理致
者取之嚴則不學者不萌僥倖之望而有嚮進之志矣

宣德中禮部尚書胡濙奏取四十歲廩生入監依次出身
濙初與鄉人王守正同學濙至宗伯守正貢期尚遠因
創此例不欲私一人故通行天下守正後官禮部主事
八年令天下生員年四十五以上者考選送國子監時言
者以士子之在學校者多衰老不得及時進用遂有此
令增開貢例以後累行之

正統三年四月以監試歲貢生員不嚴致有商議及易卷
之弊下編修謝璉及御史趙全等於錦衣衛獄

天順初給事中何琮言歲貢之設始者有司考其學行端
莊文理優長者貢至京翰林復考其中式者送監肄業



不中者有司教官皆受決罰其嚴如此近來但取食糧年深者貢之苟資次該貢雖殘疾衰老昏昧鄙猥者一槩起送及其到部考試官一槩濫取及送入監須十餘年方得取用或授以郡縣之職動靜舉止已無所措其手足又焉能立政事革吏弊而子庶民哉臣惟歲貢者國家求賢之路學廩者國家育才之具郡縣者國家牧民之所乞勅禮部都察院嚴加考選仍行巡按御史及布按二司官將府州縣學生員不通文理人物鄙猥殘疾年五十以上者不許充貢五十以下曾經鄉試未中者考試中式方許起送則非惟上有所畏盡其教養之心抑士知所重奮其向學之志矣

五年十月令天下生員年四十以上者選送國子監肄業成化四年給事中成實言近禮部奏歲貢生員若已行起送遇有事故或過一年之上者不許補貢夫以堂堂國學雖納馬納粟者皆得肄業其中何獨於此數人不能容哉乞自今不分年月久近准令次貢考補從之

十二年四月禮部言南方府州縣歲貢生員考中者例送南監景泰間因北監充撥數少暫畱今宜仍舊例從之十一年十一月程番知府鄧廷瓚奏本府新立學校士人子弟在學者乞歲貢一人許之

弘治四年九月祭酒林瀚請開科貢以進人才大畧謂今天下學校作養日盛科貢二途取有定數歲有常規不無遺材淹滯之嘆禮部議擬詔令開貢

十七年三月南京祭酒章懋奏古者太學所養皆天下俊秀故人材盛而風俗美我國家稽古制治尤重太學以敦化原洪永間太學生徒動數千計類多少俊而教育之法至爲周詳計日以通經積分以出仕布列庶位得人爲多近年生徒漸少今本監見在之數科貢止六百餘人其歲貢一行非無可與共學之資而衰遲不振者十常八九蓋由積累歲月挨次而升故也誨誘雖勤不

無扞格其舉人一行節該南京禮部劄付開送新舊舉人共該六七百人又多不肯坐監罰雖嚴於違限彼亦視爲泛常夫歲貢之入監旣由挨次舉人之坐監又每後時故差撥常患於不敷而教養尤難於見效有養士之名無得人之實近年有增貢之舉而所拔亦挨次之人資格所拘英才多滯乞於常貢外令提學憲臣於人才素多去處行選貢之法不分廩膳增廣生員通行考選務求行著鄉閭學通經術年富力強累試優等乃以充貢通計天下之廣約取五六百人照依地方分送兩監今年首行一次以後或三年五年量在監人材多少

國朝典彙卷八十四
五
間一行之如此則生徒之數可以漸及往年且多精銳可進之資不貽因循自悞之悔臣雖不知所以爲教然亦安敢不盡其心勤用提撕嚴加程督稍徬積分之意用申激勵之方務令文行兼修政教麤舉成材有望附選及時豈惟差撥恒充固將官使克稱庶乎國家有以收養士之效而臣亦少逭尸素之愆也命下所司議行嘉靖八年詔定凡正貢遇有事故卽於次年正月以前具由申提學道考選一名補貢過期者不許

十年禮部尚書李時等言 祖宗時往往得人於貢途而今之歲貢以憫老恤窮爲舊規以選賢黜耄爲苛法俗

獎旣深何以得賢自今宜依宣德正統天順年間例行兩京及各省提學官於各學廩膳內通試及多方體訪果有學行出群年三十以上者府學許貢三人縣衛學一人如期起送如廩膳無人增廣內考取增廣無人附學內考取務求真才以應明詔如有名實不稱及貢緣干進之弊聽撫按糾舉廷試如有不中式者一名以上提學官叅究五名以上降級改用仍行國子監依 祖宗監規通送廣業堂月嚴考試學業進修者方許以次升至率性堂撥送諸司辦事間有考試累優行誼著聞堪以任用者年終具奏本部會同吏部覆考得實奏請

選用廷試不如式者仍常撥歷如此則選擇既清而歲貢不患不得人矣其廩膳中有年老不堪貢者國學中有年老不堪選者予以衣巾終身俱量蠲雜徭則獲選者既自盡其才而被黜者亦不至失所 上曰朕惟祖宗設立歲貢之法實萬古里選之制期得真才以資國用邇來生員苟得幫廩卽計充貢有日往往有不修行檢挾制官司欺箴鄉里甚至虧缺倫理玷辱衣冠及有學問荒疎年力衰邁有司不問賢否止計食糧淺深一槩循資充貢却又多選任教官以爲人師欲求人材長進誠不可得自今歲貢生員令府州縣提調官選舉

有學者方許起送巡按御史處會提學并布按兩司從公查覆照常數貢舉先儘廩膳如果無人許於增廣附學內考取不許籲論食糧淺深以襲舊弊卽有年老不堪教養者令提學嚴加考選無行者黜退爲民其餘量予衣巾終身廩膳有缺者提學毋得輒聽權要子弟濫與收補如未得人寧令空缺其歲貢入京廷試再有衰老無學及檢行不修者所貢舉官一體坐罪不貸

十一月先是直隸巡按胡明善申明學政議處歲貢大學士張孚敬議行選貢法將槩學通考廩膳無人准貢增附定擬一等二等三等之說考居四等槩行黜退以寓

沙汰之意至是都御史史道請復舊法禮部尚書夏言復言 祖宗令甲歲貢必食糧年深者近欲痛加沙汰大非舊意乞遵舊制正副各一人選考不必增四五人以滋奔競 上從所議令頒示天下不得紛更奏擾十一年禮部奏今天下歲貢廷試不中式者五十九卷近本部遵奉詔書議處生徒內開廷試有不中式三名以上提學官提問五名以上降用奉 旨令巡按御史會同提學及布按二司官員從公考選起貢夫考退之罰提學官既以專職獨坐則考選之事亦須專任責成請自今止令提學遵奉勅諭悉心從事其歲貢照例食糧年深者取考果有不堪方以其次考充其廷試不中生理故事有願告冠帶衣巾終身者聽其邊地遠方本與中土不同發回難苦特甚如貴州廣西北邊或稍寬以覆試之條 上曰歲貢會選事宜俱係 祖宗舊制已有明旨巡按及二司雖係會考而提學職專提調貢非其人責實難辭五名以上降級遵前旨行三名以上提問俱自十一年爲始南北直隸提學並遼東帶考御史令南京都察院建問黜退生員願告冠帶衣巾者聽之已生員被黜五名以上降提學官湖廣副使崔同四川副使張鯤河南副使敖英陝西僉事王邦瑞各二級

先是有詔精選天下歲貢生員無專論食糧深淺尋以胡明善史道言寢格而有司奉文遵守先後各異至是歲貢至京有用四人陪考例者有用通學會考例者有用考居一等等年深廩膳例者有用正貢陪貢二人考取例者禮部上其狀因請廷試得旨祖宗設立貢法務得人物厚重通經能文者例選入貢後却以食糧淺深爲資致年老闖茸充塞正途昨已有明旨今次各項貢到生徒姑准收考後只宜照前旨施行

十三年下福建提學副史潘潢巡按御史逮問降陝西提學僉事孔天胤爲祈州知州以廷試歲貢生員潢所考上者黜落三人天胤考上者黜落六人故也

十五年時歲貢例嚴自嘉靖十一年至十四年天下郡邑缺貢至一千一百九十餘處禮部言新例既嚴提學畏避降罰於各府州縣學該貢年分多不起貢且偏方下邑旣鮮科目又無歲貢其勢必至頽廢學校盡散生徒非祖宗立法意也况考選雖名會同權實從於御史及廷考不中顧乃獨罪學官臣請查復累朝學校起貢舊例行令各提學自後惟於食糧年深者起送二人考選正貢不堪許以陪貢考充不必會同撫按二司亦不許槩學通考以啟夤緣倖進之路其廷試不中准令回

學肄業再試不中照例充吏止罰治提調官教官提學不必降級仍通行各提學將十一年後缺貢地方依例考補起貢庶事體歸一易於遵守得旨允行

十六年大學士李時等言舊例監生就教職者止授訓導近始分上卷除學正教諭中卷除訓導但先年除授訓導歷任六年尚不得轉陞學正教諭今遽授此官不免輕濫上中二等文字不甚相遠宜仍舊授以訓導俟其三年或六年教有成績方授學正等官從之

承天府學生員王同道奏承天為龍興根本重地已如順天應天二府學例將鍾祥縣學生通隸府學其廩增俱

六十名則每年起貢之數亦宜入如二學例下禮部議覆二歲起貢三人詔可

四十二年令天下督學官每歲嚴加考校如正貢考不稱則起次貢次貢復不稱則起次貢以下者必得其人乃已廷試歲貢如一省發回五人以上提學官降級別用四十五年禮部言近言官以貢途日輕欲稍更舊法在御史龐尚鵬請各郡國廩膳生員即以歲貢前例處之叙其年月久近充貢在給事中張鹵請當貢期每學起送正陪貢四人提學遴選一人宜就二臣言酌為定規今後提學考試當先嚴補廩之法考居下等者照例停降

黜退每遇貢期取年次在前者四人拔其尤若皆不稱則以次復起四人必得人乃已其至京廷試限以五月十月令翰林院詳加考校而懷挾代試等弊命御史糾察之本部驗其年力有餘者分送兩京國學肄業吏部以次序用如才識超卓即待以優禮從之

隆慶二年二月提學御史周宏祖條陳五事其一廣恩貢以實國學得旨開貢本為求才各提學官其嚴選毋濫廷試之日發回三名以上者提學官以不職論降一級

國朝典彙卷八十五

都察院右僉都御史 臣徐學聚 編輯

吏部 五十一

監生

洪武十八年命禮部選用國子生為六品以下官

二年十月更定歷事監生選用法凡歷事一年為滿考分

三等上者即授官次下者再歷一年復考考上者亦即


授考次量材選授下還國子監讀書

永樂二十二年九月中軍都督府奏本府歷事監生七人

今考所治吏事皆勤慎請如例送吏部循次授官
 宗曰爲士豈止習吏事而已吏事末也誠能窮經博古
 達於修己治人之道於吏事何難比士習日下率逐末
 以圖進取而昧於大經大法故用之往往厲民而辱國
 自今監生歷事考稱者仍命還監進學俾由科舉進庶
 幾士皆可用官得其人於是通政司引奏六科辦事監
 生二十人以滿日例應還監幸逢維新之治願仍就六
 科辦事以圖報効 上諭曰諸生不患無位但當圖所
 以無忝於位者勿徒懷倖進之心士有才德使人求而
 用之上也求用於人下也諸生宜立志國家教育爾等

固將用之無自汲汲其歸進學有成朕不汝遺時六科
 給事中多闕諸生萌僥倖之心 上灼知之故有是命
 洪熙元年中軍都督府奏監生馬聰歷事勤謹欲如近例
 送監讀書科舉 宣宗謂吏部尚書蹇義等曰 先皇
 帝欲學者皆爲實材故必令科舉出身以成遠大之用
 然人才性有高下年有長少亦可各隨所宜今後歷事
 勤謹有志科舉者聽令讀書餘如永樂舊例毋得淹滯
 宣德四年九月令兩京國子監生年十五以上學無成效
 及老疾者姚哲等二百五十三人還鄉爲民

景泰元年二月以邊圉事殷令天下生員納粟上馬者入



監限一千人其上選事例與歲貢同此納粟入監之始
四年禮部奏邇因濟寧徐州饑勅巡撫官權宜拯濟而臨
清縣增廣生員王銘等四人各願輸米五百石入國子
監讀書雖云權宜實壞士習請弛其令從之
七年八月南京禮部尚書張惠奏監生省祭不必拘其已
經幾次但歷事期近存留聽撥從之

成化二年禮部尚書姚夔奏南京兵部尚書李賓等奏勅
賑濟流民衆議欲令官員軍民子弟納米送監讀書切
惟國子監乃育才之地近因各處起送四十歲并納草
納爲生員動以萬計已不勝其濫今又行此將使天下

以貨爲賢士風日趨於陋宜別爲處置
上曰祖宗設
太學教育人才非由科貢者不得濫送今賓等欲令官
民子弟出錢穀賑民補太學生古無此例且天下財賦
所出其途孔多學校豈出錢穀之所禮部議是其勿許
四年吏部尚書李秉等奏近兩奉詔旨監生有不能出仕
願告回家者與冠帶閒住柰監生中甘於恬退者少本
部記名聽選者見有八千餘名逐年起送到部者尤多
於聽選之數其間衰老者銳氣已消庸懦者素志不立
一旦授以府州縣官不免漁獵以營家欲民受其福難
矣茲欲將該選監生考選身言書判四事俱可取者居

優等選用或三事或二事可取者量才授任其俱無可
取而年貌衰老者依詔書例令冠帶閒住從之

六年給事中程萬言言饑民流集京師米價騰踊吏部聽
選官及監生不下萬餘率多缺食故准回籍以聽取用

九年四月南京吏部尚書崔恭奏南京監生紀選於南吏
部從之初南雍監生歷事滿必抵北紀選而還卒業其
中貧乏者病於往復率多淹滯乃疏其不便南士得紀
選於南部者自此始

十一年十月國子監生三百六十一人奏臣等皆發身科
貢近有納粟入監者一千五百餘人率多幼稚而撥歷

反在臣先乞從宜處分必在學會爲廩膳者方可與臣
等相兼撥歷於是納粟監生亦奏以爲臣等皆出自學
拔有曾經科舉者朝廷以邊儲缺用下輸粟入監之例
初不以長少年齒論也俱下禮部議科貢乃祖宗舊典
納粟實一時權宜况納粟送監其復班之日多在科貢
者入監之先若仍原舊規以次取撥是使納粟者得以
遂捷取之願而科貢者不能無淹困之嗟空勅國子監
於此兩途酌其多寡分序撥歷議 上從之

二十一年二月禮部議覆南京吏部等衙門應詔陳言內
一事欲將各處納銀米監生分送南北二監自願具薪

米坐監者聽其年十三四或十五六七則俱行各處提學官收入該學肄業滿十年乃復監從之

弘治五年十一月吏部尚書王恕奏永樂宣德正統年間天下亦有災傷各邊亦有軍馬當時未嘗舉行納糧草納銀兩爲監生吏典等項事例近年以來各邊并腹裡少有災傷所在守土等官輒便奏開生員吏典人等納糧草納銀兩等項事例遂爲長策是以在學無志生員及未入學富家子弟捏作生員名色不分賢否有無學識一槩入監以圖出身將來入仕豈不誤事殃民一切小民不分能書與不能書不分市民與農民一槩聽缺

充吏不惟官司不得伊書辦文案且有違舊例及其三考役滿又免考驗一槩照依資格出身所以多不稱職以致正途監生吏典壅滯不得出身纔得選用年已向衰誰肯用心幹事不謀歸計甚至聽選年老例不入選只與冠帶閒住况此等雜途所進今日既知以財進身他日豈肯以廉律已欲不貪財害民天下治安何由可得欲將納銀納糧草等項事例限本年四月以裏通行停止今後遇有災傷及邊方糧草不足不許再行奏開前項事例貽患將來從之

十四年七月掌國子監禮部侍郎謝鐸言四事其四謂納

馬納菜入監者今日之所輸行將領於他日彝倫之
堂竟為錢虜交易之地必嚴塞其途勿令再開或國用
不足亦當別為區處下所司知之

嘉靖十年時納銀入監例停止且四年而各處間有以勘
合人數未足藉口起送者至是蘇州府復起送生員方
世儒等七人至部且溢於原額矣戶部以為言得旨納
粟係一時權宜本非正途矧合京官及方面子弟增銀
告納是導之貪也制民害國將靡有止極殊乖政典久
已停寢又何得借言勘額未足違例起送世儒等俱遣
歸給還原納銀兩諸承行官吏悉令巡撫官遠聞

奉
聖
旨

